

SCRIPT OF EVENING GOJRI NEWS BULLETIN 20SEP 1700 HRS

ایونینگ گو جری نیوز بلیٹن مورخہ 20 ستمبر 2025

یوہ آکا شوانی جموں ہے عبیدالرحمان تے نصرت چوہدری تیں خبر سنو۔

HEADLINES

- ۱۔ وزیر اعظم نریندر مودی نے کہیو ہے کہ بھارت غوبیرونی ملکاں ور انحسار ملک وستے خطرو ہے جس گو واحد علاج آتم نہہرتا یعنی ہر شعبہ مانہہ خود مختاری ہے۔
- ۲۔ لیفٹیننٹ گورنر منوج سنہا نے جموں کشمیر گا دور دراز علاقان مانہہ بسن آلا افراد وستے بہتر تے سستا طبعی علاج مہیا کران ور زور پایو ہے۔
- ۳۔ ڈوڈہ تے ادھمپور ضلع غا سرحدی علاقہ سیوج دھر مانہہ حفاظتی دستاں تے دہشت گردان بشکار ٹاکرا غے پیش نظر علاقہ غے اندر حفاظت گا انتظام مزید سخت کردتا گیا ہیں۔
- ۴۔ چیف سیکرٹری اٹل ٹلو نے جموں کشمیر غے اندر متحرک گرائیں پروگرام دو نافذ کرن خاطر وقت رہتاں عمل آوری منصوبو تیار کرن ور زور پایو ہے۔
- ۵۔ شمالی ریلوے آئندہ کل تیں جموں مانہہ ریل خدمات غو سلسلو دوباری بحال کر رہیو ہے۔

PM GUJARAT

وزیر اعظم نریندر مودی نے کہیو ہے کہ ملک نانہہ ہر شعبہ مانہہ کود مختار ہونو چاہیے اُنہاں نے کہیو کہ بھارت غوبیرونی ملکاں ور دارومدار ہمیشہ تیں ہی ایک برو خطرو رہیو ہے جناب مودی نے کہیو کہ یوہ صبح وقت ہے کہ بھارت پوری دنیا غے سامنے ایک خود مختار ملک غے طور ور ابھر غے سامنے آوے تانجے سال 2047 مانہہ ترقی یافتہ بھارت غا عزم تے ہدف نانہہ حاصل کیو جاسکے۔ وزیر اعظم نریندر مودی اج گجرات غا باونگر علاقہ مانہہ سمندر ایس ای سمردھی پروگرام غے دوران خطاب مانہہ بول رہیا تھا بھارت نانہہ ایک عالمی طاقت بنان گا اپنی سرکار گا وعدہ غو ذکر کرتا مانہہ جناب مودی نے کہیو کہ ملک سال 2047 توڑی عالمی سمندری تجارت نانہہ 3 گنا توڑی بدھان گو منصوبو رکھے پروگرام غے دوران خطاب کرتا واں وزیر اعظم نے اس طرح کہیو۔

LG HEALTH CARE

لیفٹیننٹ گورنر منوج سنہا نے کہیو کہ عام لوکاں نانہہ خاص طور ور دور دراز علاقان مانہہ بہتر تے سستا علاج ملنو چاہیے اُنہاں نے سرینگر مانہہ ایک نجی اسپتال غا نوا مرکز گو افتتاح کرتا واں یاہ گل کہی۔ ایل جی نے ڈاکٹراں تیں اپیل کی کہ وہ دیہی علاقان غا مریضاں نانہہ ماہر ڈاکٹراں تیں جوڑیں تانجے سب نانہہ اچھو علاج مل سکے اُنہاں نے اسپتال مانہہ انکھاں غا علاج غی سہولت بدھان غی کوشش غی تعریف کی تے کہیو کہ حکومت صحت غا ڈھانچہ نانہہ بہتر بنان واسطے پُر عزم ہے اس موقع ور گل کرتا واں ایل جی موصوف نے اس طرح کہیو۔

SECURITY HEIGHTENED

ڈوڈہ تے ادھمپور ضلع غا سرحدی علاقہ سیوج دھر مانہہ حفاظتی دستاں تے دہشت گرداں بشکار گزشتہ شام تیں چل رہیا ٹاکرا غے پیش نظر حفاظتی انتظامات نانہہ مزید سخت کیو گیو ہے آئی جی پی جموں نے ایکس ور جاری ایک پوسٹ مانہہ دسیو ہے کہ ایس او جی پولیس تے فوجی دستہ اس آپریشن مانہہ شامل ہیں تے متعلقہ اتھارٹیاں نے جموں سرینگر قومی شاہراہ ور وی حفاظت غا سخت انتظام کیا ہیں تاکہ عوامی تحفظ نانہہ یقینی بنایو جاسکے موجودہ صورتحال ور متعلقہ ایجنسیاں نے لگاتار نیڑوین نظر رکھی وی ہے۔

GST REFORMS

جموں کشمیر غا لوکاں نے نوا جی ایس ٹی اصلاحات غے تحت گھریلو ایلکٹرانک سامان ور ٹیکس کھٹ کرن غو خیر مقدم کیو ہے ہُن اے سی، برتن دھون آلی مشین، ٹی وی، تے مونیٹر ور جی ایس ٹی 28 فی صد تیں کھٹ کر غے 18 فی صد کردتی گئی ہے اس فیصلہ تیں مانگ بدھے غی مقامی صنعت کاراں نانہہ بڈھاوو ملے غو تے باہر تیں چیز منگان غی ضرورت نی پے گی۔ یوہ ریٹ سوموار تیں نافز وے گو اس بارے ایک مقامی افراد نء اس طرح کہیو۔

SWASTH NARI SASHAK PARIVAR J&K

طبعی شعبہ مانہہ خواتین غی باختیاری خاطر جموں کشمیر مانہہ سوسٹہ ناری سشسک پریوار ابھیان اہم کردار ادا کر رہیو ہے اس قدم غے تحت 2 اکتوبر 2025 توڑی آیوش مان آروگیا مندران تے سی ایچ سی مرکزاس ور مفت طبعی معائنو تے طبعی خدمات دتی جارہی ہیں خواتین نانہہ اس بارے آگاہ کیو جے کہ وے اپنا نزدیکی طبعی کیمپ غو دورو کریں تے ان طبعی خدمات تیں فائدو حاصل کریں۔

CS VVP II

چیف سیکٹری اٹل ڈلو نے متحرک گرائیں پروگرام دو غی عمل آوری غو جائیزو ليو اس دوران موصوف نے متعلقہ افسراں نانہہ ہدایت دتی کہ وے متعین وقت غے اندر ایک موثر عمل آوری منصوبو تیار کریں مرکز غی طرفوں مالی معاونت غا اس قدم وستیے سال 2024 تیں 2029 توڑی 6 ہزار 8 سو 39 کروڑ روپیاں غی رقم مختص رکھی گئی ہے جس غو مقصد 8 سرحدی ضلعان گا 124 سرحدی گرائیاں گی مجموعی ترقی ہے ان سرحدی ضلعان مانہہ جموں سانہہ کٹھوعہ راجوری پونچھ بارہمولہ بانڈی پوری تے کپواڑہ ضلعو شامل ہیں۔ چیف سیکرٹری نے پی ایم جی ایس وائی، این آر ایل ایم تے پی ایم شری اسکیمان غو وی ذکر کیوتے کہیو کہ وی وی پی دو پروگرام وکست بھارت 2047 غو ایک حصو ہے جس مانہہ سرحدی ضلعان غا دور دراز علاقان مانہہ سیاحت نانہہ بادو دین تے دیگر ضروری تعمیراتی ڈھانچہ غی ترقی خاطر خصوصی توجہ دتی جے گی۔

NORTHERN RAILWAY TRAIN UPDATE

بھاری بارشاں تے سیلابی صورتحال غے پیش نظر خطہ جموں غے اندر منقطع ہویا ریل خدمات غا سلسلہ نانہہ آئندہ کل تیں دوبارہ بحال کیو جارہیو ہے حفاظتی تدبیراں نانہہ مد نظر رکھتاں مانہہ مرہلہ وار طرز ور شمالی ریلوے نے اعلان کیو ہے کہ جموں توی تیں وارانسی جموں توی تیں پٹنہ تے جموں توی تیں ہوورا جان آلی ریل

گڈیاں نانہہ آئیندہ کل تیں چلايو جے غو۔ اسے طرح شری ماتا ویشنو دیوی کٹڑہ ڈاکٹر امبیدکر نگر ریل آئیندہ سہوار تیں شروع کی جئیں غی خطہ غا سنئیر کمرشل منیجر اوچت سنگل نے واضع کیو ہے کہ ریلوے رستہ غا تکنیکی کام کاج تے پُلاں گو کام تقریباً مکمل ہو گیا ہے مسافراں نانہہ ہدایت کی گئی ہے کہ وے سفر کرن تیں پہلاں شمالی ریلوے غی ویب سائینٹ نانہہ ضرور دیکھیں یا فر ہیلپ لائین نمبر ور رابطو کرلیں۔

SEWA PARV

سیوا پرو اقدامات غا سلسلہ مانہہ پورا ملک مانہہ تقریبات غو سلسلو جاری ہے اس ضمن مانہہ اج بھار غا ڈیجیٹل طبعی نظام مانہہ مودی سرکار غا کردار غو زکر کیو جے غو سال 2021 مانہہ آیوش مان بھارت ڈیجیٹل مشن غی شروعات کی گئی جس دوران تقریباً 80 کروڑ آیوش مان بھارت طبعی کھاتہ بنایا گیا جس نال 71 کروڑ طبعی ریکارڈ جوڑیا گیا 16 سو کروڑ روپیاں غی اس سکیم غو مقصد طبعی سہولیات نانہہ مزید بہتر کرنو تھو اسے طرح اس مشن گا ای سنجیووانی پلیٹ فارم دور دراز علاقان مانہہ ٹیلی ادویات خدمات مہیا کراغے صحت غا شعبہ مانہہ انقلاب لیا رہیو ہے۔ اس پروگرام نال دور دراز دیہی علاقان گا افراد طبعی ماہرین تیں صلاح حاصل کر رہیا ہیں اس ضمن مانہہ مزید بولتا واں جناب مودی نے اس طرح کہیو۔

PROG ANN

آکاشوانی جموں غو علاقائی خبراں آلو شعوبو ایک خصوصی پروگرام پیش کرے غو جہڑو 25 منٹاں غو وے گو جس غو موضوع ہے جامنی انقلاب غے ذریعے دیہی معشیت نانہہ مضبوط بنانو۔ یوہ خصوصی پروگرام سیوا پرو 2025 غی تقریبات غا سلسلہ مانہہ پیش کیو جارہیو ہے۔ جہڑو 15 ستمبر تیں منایو جارہیو ہے یاہ خصوصی نشریات 22 ستمبر 2025 نانہہ تہاڑی غا 12 بجے نشر کیو جے غو۔ اس پروگرام مانہہ مارا مہمان ویں گا ڈائریکٹر ڈاکٹر زبیر چودھری جہڑا سی ایس آر آر جموں تیں تعلق رکھیں اس موضوع ور اپنی رائے تے ماہرانہ خیالات سانجہ کریں غا پروگرام غی میزبانی کریں غی ماری اینکر ابھیلاشا شرما تے شروتی کھجوریہ۔ سامعین یوہ پروگرام میڈیم ویو 303 میٹر یعنی 990 کلو ہٹز تے ایف ایم 100.3 میگا ہٹز ور سُن سکیں غا۔

TOURISM PARAGLIDING

مہماتی سیاحت تے نوجوانان غا روز گار نانہہ بدھان واسطے ایک بڑو قدم چاتا واں جموں کشمیر غی محکمہ سیاحت نے دور دراز علاقان غا نوجوانان واسطے جدید پیرا گلائڈنگ ٹریننگ غو پروگرام شروع کیو ہے محکمہ سیاحت جموں گا ڈائریکٹر وکاس گپتا نے اس پروگرام غو آغاز کیو مُنتخب نوجوانان نابہ 21 تیں 25 ستمبر توڑی ہماچل پردیش غا مشہور پیرا گلائڈنگ مقامات بر بلنگ تے بیللاس پور مانہہ کمرشل سطح غی تربیت دتی جے غی اس پروگرام غو مقصد مقامی نوجوانان نانہہ مہماتی سیاحت غی خاص مہارت دینو ہے تابنچے اُنہاں نانہہ روزگار غا نوا موقع مل سکیں تے جموں نانہہ ایک پُر کشش مہماتی سیاحت تے آوٹ ٹور سرگرمی غی منزل غا طورور فروغ دتو جاسکت اس بارے مزید تفصیلات دیتا واں محکمہ سیاحت جموں غا ڈائریکٹر وکاس گپتا نے اس طرح کہیو۔
